

ISTITUZIONI

Lumes e ombriës per ladins, mochegn e cimbres

La 30^a Conferenza de la mendranzes linguistiches à palesà i resultat arjonc ma ence i aspec critics per la comunanzes de lengaz mender del Trentin

La é stata chiamèda ite en mercol ai 9 de dezember, la Conferenza perveduda a l'art. 9 de la Lege provinzièla nr 6 del 2008 su la mendranzes linguistiches de la Provincia de Trent. Ruà a sie trentesem apuntamento, chest organism olache vegn portà dant e valutà la politiches per la popolazions de lengaz mender de la Provincia, no l'ha ampò tout dant l Pian de politica linguistica per l'an 2021, descheche vegnia fat per solit te l'apuntamento de la fin de l'an: l Pian vegnarà aproà te la scontrèda perveduda per i 14 de jené, canche la Conferenza cognarà dèr l parer obligatorie sul program di intervenc per l'editoria e l'informazion e su la spartijon del Fondo provinzièl per la mendranzes per l'an 2021.

N confront critic e rich de stimoi

Chest'outa la scontrèda é stata pissèda soraldut desche ocasion de confront avert con i referenc politics e i componenc de la Conferenza pervedui per lege, che l'è i raprejentanc de la amministrazions e istituzions di lesc de mendranza, di Istitut Culturai, de la Scoles, de l'Union di Ladins de Fascia e de l'Union Generela di Ladins dla Dolomites. En dut i era ampò presciapech 60, anter partezipanc con derit de parola e operators de l'informazion, di servijes linguistics e de l'istruzion, chi che à tout pèrt travers la videoconferenza, tegnuda con demò i funzionères e l President de la Provincia biné en prejenza te sala de la Jonta a Trent.



I componenc à tout pèrt a la Conferenza de la mendranzes travers la piataformes digiùeles.

La scontrèda é stata averta da la neva dirigenta del Servije Mendranzes linguistiches locales e audit european Giuliana Cristoforetti, che à palesà sia sodesfazion per l renovament del desch de la comunicazion per la mendranzes e per l'istituzion del nef desch interdipartimentèl che permet de tor dant la costions che revèrda la comunanzes de mendranza de desvaliva sort per poder troèr soluzions operatives de gra a la prejenza de funzionères e referenc politics di desvalives setores.

Cristoforetti à recordà ence la mozion portèda dant dal conseier provinzièl Luca Guglielmi del 2019 e aproèda dal Consei provinzièl, per la दौरa di lengac ladin, mochen e cimber te la comunicazions istituzionèles e l projet de na neva enrescida su la

situazion soziolinguistica de la mendranzes che no era più ajornèda da n muie de egn. Ence sun chisc ponts, desche su la dezijions da tor per permeter la difujion di programes per todesch e ladin sun dut l tegnir provinzièl, vegnarà rejonà più avisa ai 14 de jené.

La conscidrazions de Pallaoro e Detomas

Dò l salut da man de la dirigenta del Departiment afares e relazions istituzionèles Valeria Placidi, l'è entervegnù l President Maurizio Fugatti, che l'ha sottrissà la volontà de la PAT de seghitèr a investir tel stravardament e l svilup di lesc de mendranza, setor emportant per duta la comunanza trentina.

La parola é jita dapò al president de l'Autorità per la mendranzes linguistiches Dario Pallaoro, che à rejonà de la situazion de la mendranzes che l'Autorità, che tol ite ence la avocates Luciana Rasom e Giada Nicolussi e l'ha n mandat de 7 egn, l'ha podù veder ti 6 egn da sia nomina. Pallaoro à palesà vèlch pont de sodesfazion, desche l'istituzion del cors de auta formazion Antropolad e del desch interdipartimentèl e l fat che sie endò stat istitui l Servije per la mendranzes, che ti egn passè era stat smendrà a unità. Ampò l'ha metù dant ence desvalives aspec critics, palesan l besegn de na maor sinergia anter la Provincia, la Scuola e la comunanzes de mendranzes per slarièr fora la cognoscenza de la cultures menders te dut l Trentin. Pallaoro à rejonà ence del pericol raprejentà per la mendranzes linguistiches da la banalisazion de cultura e lengaz per fins de comèr e del besegn de meter a jir sistemes de valutazion de la politiches linguistiches, encèria senestra che l'Autorità coche la é stata perveduda no l'ha l met de portèr inant a na vida percacenta.

Sun chisc aspec l'è entervegnù dapò ence l Procurador del Comun General de Fascia Giuseppe Detomas, rejonan de n sistem giuridich trentin n muie fort per la mendranzes (*a chel che ence el personalmente à dat n gran contribut, ndr.*) ma oramai mingol datà, che l va dò a criteries di egn '90. Detomas à rejonà de la figura de l'Autorità, che la é stata depotenzièda respet a coche la era stata pissèda, conscidran che en cont de stravardament de la men-

dranzes duc i é a una a nivel teorich, ma canche la maoranza cogn renunzièr concretament a vèlch en favor de la mendranzes la robes muda patoch. Detomas à dit amò che i projec al ben del lengaz i cogn esser dalbon percacenc per chest obietif e no per de etres e che l stravardament di deric cogn valer per dutes la mendranzes, senza eccezions.

A la Conferenza l'è entervegnù ence i dozenc de l'Università de Trent Jens Woelk, Giorgia Decarli e Federica Ricci Garotti. Woelk à rejonà del sistem trentin per la mendranzes tel chèder talian e european, metan l'azent desche Detomas sui aspec giuridics, coi mudamenc di prinzipies che dai conzec de stravardament e de mendranzes i rejonan ades de inclujion e de sozietà complessiva. Decarli é jita ite enveze su la esperienzes de la scoles mochen e cimbra, sottrissan che a n chèder normatif provinzièl n muie fort per la mendranzes no corespon te la realtà n chèder atuatif autertant percacenc. Su la medema strèda l'intervent de Ricci Garotti, che à uzà fora la critizità de n sistem scolastich che, per la mendranzes mochen e cimbra, delega l'ensegnament del lengaz de mendranza demò a projec e no a n chèder stabol.

Sun chest la situazion é miora te Fascia, olache la neva endesfida, aldò di mudamenc de desvaliva encèries, l'è chela de arjonjer na bona colaborazion anter duta la istituzions per poder portèr inant na politica linguistica percacenta.

Lucia Gross